

Segun Dr. Salazar, rapport di PAHO ta indica:

Parkietenbos ta un deposito di sushi cu no ta cumpli cu ningun norma ni di medio ambiente ni di salud


ORANJESTAD (AAN):

Dr. Wilmer Salazar, di Departamento di Salud a indica cu durante e tempo cu tabata tin hopi keho for di e habitantenan den e barionan den cercania di dump relaciona cu humo, molester di musica, etc, a haci un peticion na Minister di Salud pa bin cu un team multi-disciplinario cu representantenan di instancianan concerni.

Dr. Salazar a agrega cu e meta tabata pa bin cu un maneho structural ariba e situacion aki rond di dump unda un experto ariba e materia aki lo por bisa cual ta e caminda corecto cu mester cana.

E problematica no ta di aworaki, pero tin hopi aña andando. Na aña 2018, Departamento di Salud Publico a haci un solicitud na Organizacion Panamericano di Salud (PAHO) pa por apunta un experto ariba e materia di desperdicio y recogemento di sushi, pa evalua con e situacion ta y duna recomendacionnan pa por sigui cu un proceso, e experto a señala.

Banda di esey, gobierno a



instala un comision multi-disciplinario pa wak cual tabata e impacto ambiental, di salud, economico pa por soluciona e problema na un manera efectivo, duradero, Segun Wilmer Salazar, e persona cu a bin Aruba ta un experto reconoci door di Organizacion Mundial di Salud. El a bishita e area na unda e recogemento di sushi y e destruccion ta tuma lugar na Parkietenbos.

E persona aki a bishita, evalua y a pone su recomendacionnan. A base di esey, e team multi-disciplinario tambe trahando ariba dje pa asina yega na un solucion definitivo y sostenibel na Parkietenbos, Dr. Salazar a

remarca.

E rapport ta papia na prome lugar di e ubicacion di Parkietenbos, cual ta un situacion cu ta genera peliger na medio ambiente, salud di hende, na bienestar social, economico, entre otro, a

bisa.

Den su conclusionnan ta bisa bon cla cu Parkietenbos ta un deposito di basura cu no ta cumpli cu ningun norma, ni medio ambiental ni di salud. Pesey e prioridad ta pa elimina y resolve e problematica di Parkietenbos y bin cu solucionnan alternativo.

Un di e solucionnan alternativo tabata pone den cierto areanan incinerators pa por procesa e sushi di un manera integral cu lo por genera menos toxico posibel den medio ambiente cu control di aire, suela y awa, a duna di conoce.

Esey ta loke e grupo di 'waste management' ta trahando ariba dje, Dr. Wilmer Salazar a declara. No ta un proceso di awe pa mainta pasobra e tin un proceso hopi largo y mester garantiza cu instancianan cu ta instala e incinerator of tur e procesamiento mester cumpli cu cierto normanan y lamentablemente na Aruba no tin ni ley ni regulacion. "Pasobra sin ley no por tin un maneho.

Salazar a bisa cu ta keda di parti di gobierno como responsable pa garantiza e maneho di e sushi y e inspeccion cu tur e instancianan cu ta traha ariba esey cu lo por cumpli cu normanan nacional of internacional di seguridad y control di salud di hende y medio ambiente.